



KENYATAAN MEDIA

SITUASI TERKINI JANGKITAN COVID-19

DI NEGARA BRUNEI DARUSSALAM

06 April 2020

1. Alhamdulillah, dan dengan izin Allah Subhanahu Wa Ta'ala jua, Kementerian Kesihatan ingin memaklumkan bahawa pada hari ini, Isnin, 12 Syaaban 1441 bersamaan 06 April 2020, **tidak ada kes baru** yang disahkan dijangkiti COVID-19 di negara ini. Oleh yang demikian, jumlah keseluruhan kes COVID-19 di Negara Brunei Darussalam kekal sebanyak **135 kes** setakat ini. Walau bagaimanapun, penularan wabak COVID-19 ini masih belum berakhir dan kita masih perlu mematuhi langkah-langkah pencegahan bagi mengurangkan risiko penularan wabak tersebut daripada berleluasa.
2. Sementara itu, sebanyak **9 lagi kes** yang dirawat di Pusat Pengasingan Kebangsaan telah disahkan sembuh dan dibenarkan untuk pulang ke rumah, membawa **jumlah keseluruhan yang telah sembuh kepada 82 orang**. Ini bermakna terdapat 52 kes yang masih dirawat di Pusat berkenaan. Daripada jumlah tersebut, 1 daripada 3 kes yang sebelum ini dalam keadaan kritikal dan memerlukan bantuan mesin pernafasan di

Unit Rawatan Intensif di Pusat tersebut telah beransur pulih dan tidak lagi memerlukan bantuan mesin pernafasan. Pada ketika ini, beliau adalah di dalam pemantauan rapi. Sementara itu, 2 orang masih dalam keadaan kritikal di mana salah seorang daripadanya masih memerlukan bantuan mesin tambahan *heart/lung machine (ECMO)*. Sementara itu, selebihnya adalah dalam keadaan yang baik.

3. Pada hari ini juga, jumlah keseluruhan mereka yang telah menamatkan tempoh kurantin menurut Akta Penyakit Berjangkit Penggal 204 ialah sebanyak **2124 orang** dan hanya **237 orang** sahaja yang masih menjalani kurantin.

4. Pada hari ini juga, seramai 305 orang lagi telah menamatkan tempoh pengasingan diri di tempat-tempat pengasingan yang disediakan oleh Kerajaan dan dibenarkan untuk pulang ke rumah masing-masing, membawa kepada jumlah keseluruhan sebanyak **628 orang**. Sejak awal Januari 2020, sebanyak 8,261 ujian makmal bagi COVID-19 telah dijalankan, yang membawa nisbah kepada 1 dalam 53 orang ramai yang sudah dibuat pemeriksaan bagi COVID-19.

5. Menurut statistik kes COVID-19 di Negara Brunei Darussalam setakat ini, 25 daripada 135 kes yang telah dikesan (18.5%) adalah di kalangan warga asing. Ini termasuk beberapa orang pekerja asing yang berkerja di negara ini. Oleh itu, Kementerian Kesihatan akan mempertingkatkan pemantauan penularan wabak COVID-19 di negara ini khususnya di kalangan pekerja-pekerja asing di mana Kementerian Kesihatan dengan kerjasama Kementerian Hal Ehwal Dalam Negeri akan melaksanakan ujian makmal secara rambang (*random*) di kalangan pekerja-pekerja asing yang berkerja di negara ini. Majikan-majikan yang terpilih akan dihubungi untuk membawa pekerja-pekerja berkenaan menjalani ujian makmal secara percuma. Kerjasama dari majikan-majikan berkenaan adalah sangat diharapkan bagi membantu usaha pihak Kerajaan membendung penularan wabak tersebut di negara ini.

6. Kementerian Kesihatan juga sekali lagi ingin menekankan kepada orang ramai, walaupun pada masa ini, penularan jangkitan COVID-19 di Negara Brunei Darussalam adalah terkawal, namun kita tidak boleh leka dan seharusnya terus-menerus melakukan langkah-langkah pencegahan. Bagi gedung-gedung perniagaan, kedai-kedai runcit hendaklah melaksanakan langkah-langkah seperti menyediakan alat pemeriksaan suhu badan dan hand sanitizer disamping menghadkan jumlah pelanggan pada satu masa, membuat tanda-tanda penjarakkan diri, memastikan kebersihan troli-troli dan bakul-bakul, dan lain-lain. Peniaga-peniaga adalah juga

dinasihatkan untuk menyediakan kaedah penjualan alternatif dalam usaha untuk mengurangkan kontak dan perkumpulan ramai seperti memberikan perkhidmatan pandu-lalu (*drive-through*), perkhidmatan hantaran ke rumah-rumah (*delivery service*), perkhidmatan pengambilan sendiri (*self-pickup service*) dan lain-lain. Sehubungan dengan itu, orang ramai adalah dinasihatkan untuk sentiasa mempraktikkan penjarakkan fizikal dan sosial (*social and physical distancing*) ketika berada di gedung-gedung perniagaan, pasar-pasar sayur dan ikan, kedai-kedai runcit dan dimana-mana jua; tidak meluangkan masa yang terlalu lama semasa membuat pembelian serta mengelakkan daripada memasuki ke tempat-tempat yang sesak dan ramai orang. Bagi mereka yang berisiko tinggi terutama sekali warga emas sebaiknya untuk lebih berhati-hati ataupun berjaga-jaga dan sebolehnya segala pembelian keperluan seharian dipesankan kepada ahli keluarga lain yang berisiko rendah. Di sini jua saya ingin mengambil kesempatan mengingatkan dan menasihatkan orang ramai, untuk mengutamakan kaedah penggunaan atas talian atau *online* bagi segala urusan kerajaan atau perbankan yang mempunyai kemudahan untuk membolehkannya berbuat demikian.

7. Untuk maklumat lanjut dan perkembangan terkini, orang ramai boleh melayari laman web Kementerian Kesihatan iaitu **www.moh.gov.bn** atau menghubungi **Talian Nasihat Kesihatan 148** (pada bila-bila masa) atau melalui aplikasi **healthinfo.gov.bn**.

- **TAMAT** -

Rujukan : KK/PR/2

Tarikh : 12 Syaaban 1441H / 06 April 2020